

SIPA izvela akciju kodnog imena Sunce

Petorica uhapšenih terete se za više pljački

Osumnjičeni za pljačku skladišta firme Vision u Tomislav-Gradu odakle je u julu ukradeno 3.000 naočara vrijednih 1.500.000 KM

U zajedničkoj policijskoj akciji kodnog naziva Sunce pripadnici Državne agencije za istrage i zaštitu, u saradnji sa pripadnicima MUP-a Kantona 10 i pripadnicima MUP-a Hercegovačko-neretvanskog kantona, jučer u ranim jutarnjim satima na području Mostara uhapsili su pet osoba, saopšteno je iz SIPA.

Kako nezvanično saznajemo, uhapšeni su Anes Kurbegović, Šehherzada Porić, Darko i Vjekoslav Sliško i Semir Serdarević zbog sumnje da su kao članovi zločinačke organizacije počinili krivično djelo teška krađa. Navedene osobe se sumnjiče da su izvršile više pljački na širem području Hercegovine. Anes Kurbegović tretiran je u okviru predmeta kodnog naziva Lutka i pod mjerama je Suda BiH. "Određeni broj osumnjičenih osoba još je u bjekstvu", navedeno je u saopštenju SIPA.

Uhapšene osobe privedene su u službene prostorije MUP-a Hercegovačko-neretvanskog kantona u Mostaru. Među uhapšenima je i Kurbegović, optuženi u predmetu Lutka, potvrdio je njegov advokat Senad Kreho.

"Imam informaciju da je moj klijent priveden i zadržan. Još ne



Policija zaustavila kamion s cigaretama

znam tačno zbog kojih krivičnih djela. Jutros me je nazvala Anesova supruga i to mi saopštila", rekao je Kreho.

U okviru ove akcije, kako je saopšteno iz SIPA, zaplijenjen je kamion cigareta koje su ukradene u jutarnjim satima na području Mostara. Obavljen je uviđaj te pretresi objekata na više lokacija, s ciljem pronalazjenja i privremenog oduzimanja predmeta koji mogu poslužiti kao dokaz u daljem postupku.

Nezvanično, osumnjičeni se terete za pljačku skladišta firme Vision u Matoševoj ulici u Tomislav-Gradu odakle je u julu ukradeno 3.000 originalnih naočala

svjetski poznatih marki Police, Lozza, Furla, Loewe... Maloprodajna vrijednost ukradene robe iznosi oko milion i po maraka. Lopovi su također odvezli i VW caddy (A79 J 896), vlasništvo ove firme u kojem su odnijeli ukradenu robu. To vozilo je ubrzo pronađeno u Uskoplju, dok se za skupocjenim naočalama još traga. U skladište su upali nakon što su onesposobili alarmni sistem.

Uhapšeni se povezuju i s pljačkom Sparkasse banke u Mostaru, koja je izvedena 18. jula, te sa još jednom pljačkom banke na području Livna. Iz Sparkasse banke ukradeno je oko 40.000 KM. **D. P.**